



Na tur partido politico di Aruba  
participando den Eleccion 2009

Oranjestad, 31 juli 2009  
#28-09/CBB

Asunto: Organizacion di evento publico sin permiso

Apreciable dirigentenan di partido,

Pa medio di esaki Comision Bon Boluntad (CBB) cu a inicia trabao di Cuerpo di Supervision hunto cu e partidonan politico cu a firma e Convenio Electoral 2009, ta desea di trese na atencion di tur partido cu por observa cu varios vez den e campaña actual ta tuma lugar evento politico espontaneo riba caminda publico, sin cu tin e permiso corespondiente pa esaki. E eventonan aki ta stroba fluho normal di trafico y ta un molester pa e ciudadano cu tin e derecho di haci uso di caminda publico pa yega unda e ta desea di yega, sin estorbo di evento cu no ta conta cu e permiso necesario di autoridadnan policial.

Tambe den e eventonan aki tin partimento di material di propaganda (sticker, p.e.) unda ta crea un ambiente no agradable pa e ciudadano cu no ta desea di duna di conoce su color o preferencia politico, aceptando o nengando e material ofreci den un situacion cu e no por evita.

CBB ta haci un apelacion na tur partido politico pa tene debido cuenta cu e hecho cu, mescos cu tur otro persona o organizacion, nan tambe mester atene nan mes na ley y percura pa e permiso corespondiente via e canalnan normal di cuerpo policial. Como posible futuro gobernante, partidonan politico tin un obligacion moral pa duna bon ehemplo na e ciudadanía den cumplimiento di ley y respet pa otro. Comision Bon Boluntad ta spera di por conta cu colaboracion di tur partido politico den esaki, independientemente si nan a firma e Convenio Electoral 2009 cu CBB of no.

Atentamente,  
Na nomber di Comision Bon Boluntad

drs. Lydia Emerencia  
Presidente

Copia: Prensa